

Vahtsõnõ muromäng Rõugõn

KABUNA KAILE

Ku sul om paar sõpra ja tegünes mõtõ hinnäst näidega kuun värskin õhun liiguta, sis hää võimalus tollõs om Rõugõn Oõbikuoru keskusõ lähkül, kon perekund Karu om uma hainamaa jalgpalligolffi jaos valmis säändnõ.

Jalgpalligolff om sego katõst nii-üldä muromängust – jalgpallist ja golffist. Pall om vaia lüvvä mulku raa lõpun nii, et lüüke olõs võimaligult veidü. Perreesä Karu Taavi ütles sissejuhatusõs õkva, et seo mäng passis üttemuudu häste kõigilõ põlvkundõlõ – latsist vana-vanõmbidõni. «Ei olõ vaia ka määnsitki erioskuisi. Tuujaos, et jalgpalligolffi mängi, ei piä mõistma ei golffi, ei jalgpalli,» võtt tä järgmädse pinge maaha.

Esiki varustusõ pääle ei piä mõtlõma. Uma perre latsõ, kiä mängu ette näütsi, anni pallilõ huugu palli jalaga, a muidogi ei olõ keelet jalavarjõga tulla. Palli omma kohapääl olõman ja paprõ punktõ arvõstamisõs saa kah perrerahva käest. Või-olla ei piä eräle kogoni rõõmsat miilt ütten võtma: mäng haard ütten ja tege tujo nii vai tõistõ hääs.

Jalgpalligolffi Rõugõlõ tuuja esi saiva mänguga tutvas, ku seo keväjä koolivaheaol perrega Saksamaal ümbre sõidi. Üten pargin prooviti mängi kah. Vahtsõnõ muromäng naas nii miildümä, et ku kodo jõuti, kaeti umma hainamaad

õkva vahtsõt muudu.

Paar-kolm nädälit võtsõ aigu mängorato paprõ pääl plaanminõ, niitmine ja takistuisi ehitämine. Viimädse man tull terve talopojatarkus appi: käüki lätõs saisva kraam nigu vana kaosalvõ ja autokummi.

Rõugõn om ütessä rata, kokko 350 miitret. Raameistri omma vällä märknü ka soovitusligu lüümiisi arvu, millega võissi pall mulku jõuda, no kokkovõttõn olõnõs kõik iks mängjäst hindäst. Kõgõ mõistlikumb om mängu alosta pundiga, kon om 3–5 inemist. A ku tulõ suurõmb seltskund, saa tuu ka mitmõs jaka ja ütstõsõ perrä raa pääle laskõ.

Milles mitte ka piknigukorvi ütten võtta, vaihõpääll kiilt kasta, pruukosti hampsada ja sis vahtsõ tsõõri pääle minnä. Esiki latsõ hällüpäivä saa säändsel moel värskin õhun pitä.

Seo suvi om õdagist vällänolõkit katõ käega tugõnu. Tuud heldüst om perekund Karu tegüsäle är pruuknu. Palliveerütämine golffiraa pääl ütten latsi ja hulga sõpruga om olnu ka näile hindäle küländ sakõ õdagi aoviidüs. Nigu Karu Taavi üteli, om püme hüsen mängen näütüses api tuust, ku palli omma valgõ.

Perrerahvas om pidänü ka rekordiarvõt. Nätäl aigu tagasi oll seo 35 lüüki. Tuu tähendäs, et nii veidü lüüke om olnu vaia, et ütessä rata riiglide perrä algusõst lõpuni läbi tetä. Tuud või egäüts muiduki egä kell ümbre toukama minnä.

«Maal piät teküs olõma. Ja ku mõnoga tetä, sis õnistus kah,» oll Karu Taavi vastus imehtüse pääle, et iks jakkus näide perrel värskit plaanõ, midä maal ette võtta.



KABUNA KAILE PILT

Perreesä Karu Taavi ja noorõmb põlv Emil, Kirke ja Anni (jäi fookusõst vällä) näütsi ette, kuis jalgpalligolffi mängmine käü.

Veidüpruugituid mõttit om näil naasõ Rõõmu Grethega tsävätänü jo varrambagi, ku mõtõlda kas vai puupilte pääle, midä näide perrefirma tege.

No saa jäl üte ettevõtmisõ kotsilõ üteldä: mõtõldu – tettü. Mitte mõtõldu – mõtõldu, nigu kah sakõst tüküs minemä.

Rõugõ om suvõaol esiki kõütvä kant, a om üte ligitõmbaja mano saanu: sääl omma jo kinä järvesilmä, om söõgi- ja magamiskotussit, om, midä kaia, no om ka üts võimalus man, kuis lahheld aigu müüdä saata.



TANILSOO JAANUSÕ PILT

Rõugõ jalgpalligolffi rada droonipildi pääl.

Vana pilt kõnõlõs



PILT VANA-VÕROMAA KULTUURIKUA MUUSÕUMIST

Ratsasporti tetti Eesti aol Võromaal kah: pildi pääl om võrõkõnõ Kalliveri Jaan 1935. aastal Tõndil võistlõman.

Hobõsidõga tetti imeht

Ku nüüt peetäs Eestin egä nädälvaihtus määnestki festivali, sis esisugumast aoviidüst otsiti ja pakuti inneskõidõs aol kah. Nii kõrrald Nursi patarei 27. põimukuu 1933 suurõ ratsapido. Patarei tahtminõ oll nõsta Võromaa rahva huvvi hobõsidõ ja näide mõistmiisi vasta. Pääle patarei kuunsaisu võti võistluisist ossa eräratsamehe.

Pidokava oll pikk. Pallo nalla ja naaru paksõva niinimadu pühapäväratsamehe. Ehtsä

tõmbõnummõr oll häire. Tuu tähendäs, et hobõsõ olli iist võedu ja mehe unnõ suiknu, ku näil tull signaali pääle hinnäst lahingus valmis panda. Lätõs nii, et joba paar minotit pääle häiret oll patarei valmis vainlasõlõ tuld andma.

Päältkaejilõ paksõ huvvi ka suurtükke tõkkõsõit. Kõik näüdäs, et patarei hobõsõ omma väega hää oppust saanu.

Rataspidost kirot Võru Teataja. Lõpõtusõs and aoleht teedä, et kuna pido rahvalõ miildü, sis tulõs säändsit päivi edespitõge kõrralda.

RUUSMAA ARTHUR

Kodukandipäivä peeti võru keelen

VISSALI MALLE

Kangsti küläplatsi pääle tull hainakuu viimäne puulpäiv ümbrekunna küllist kokku pia veeränd tuhat inemist, et uma kandi rahvaga kodukandipäiv maaha pitä.

Säändsit kokkusaamiisi olõmi pedänü egä viie aasta takast. Timahava pühendimi kodukandipäivä Eesti juubõli- ja Euroopa kultuuriperändiaastalõ. Et umma kultuuriruumi tukõ, kõnõlimi terve pidu võru keelen ja vardan lehvse võrukõisi lipp.

Alustimi tuuga, et pansõmi mi kandist kiudutõduisi perreide mälestuskivi man kõigi kadunuisi mälestüses palama kündle. Edesi kõnõldi paikunna inemiisi tegemiisist, pakuti taludõ toodangut ja käsitüüd. Kõkkõ kraami sai ka ütten osta. Huvilidsõ saiva kaia küläseldsi kroonikaraamatit ja välläpanõkit aoluust.

Latsilõ näüdäti, midä vanast kotun kässi vaihõl tetti. Tammi-ku käsitüütalu pand Eesti 100. sünnipäivä avvus vällä sada paari sukkõ. Tuuma lambakasvatustalu näüdäs ummi lambit ja tallõkõsõ olliki latsi jaos kõgõ suurõmb tõmbõnumbri.

Õdagu joosul sai kullõlda lõõdsakuninga Ojasaarõ Too-



PILT ERAKOGOST

Tammiku talu tõi EV100 avvus näütüsele sada paari sukkõ.

masõ ja tä opilasõ Hordo Kerutu pillimängu, kaia Harjumaa segärühmä Kapak rahvatandõsõ ja noid ka oppi. Tegemiisi, võistluisi ja mängõ jakku egän iän huvilidsilõ ja ütitselt süüdi EV100 sünnipäiväpartiti. Simmanil tandsiti Wismari Poistõ pilli perrä.

Võtsõmi pästeammõdi hoiautust suurõ tulõohu kotsilõ tõsitõlõ ja tuld seokõrd palama espanõ. A õdagunõ väiku vihmmõl pidulidsile peris värskendüses.

Aituma kõigilõ, kiä kodukandipäiväst ossa võtsõva ja mi ettevõtmist tugõsiva!

Umakeeline laul Euroopa süämen

Umakeeline laul helisi piimäkuu alostusõn Umal Pido Kubja pedäjide all, a kats kuud ildamba sai tuustsamast lauluvarast ossa kullõja Praha uulitsidõ pääl.

Tõshhi pääliinan peeti hainakuu tõsõn poolõn riikevaihõlist folkloorifestivali, kon Eestit tekõ tõisi siän tutvvas Tartõ üliopilasõ luuduskaitõtsõõri segäkuur (edespitõ: tsõõri kuur) võrokeelitside laulõga. Tsõõri koorin lõõvõ ütten noorõ tiidrü ja üliopilasõ. Kuur luudi 1999. aastagal ja om pühendünü koorijuhilõ Lorvilõ Sirle iistvõtmisõl ossa võtnu kõgõst viiest Umast Pido.

Takastperrä või üteldä, et hulk pruuvõ, miä om tettü Tartõn Vanõmuisõ uulidsa aoluulidsõn õpõhuunõn tuu hääs, et võrokeeline laul häste kõlama nakanu, ei olõ olnu tühi vaiv: tsõõri kuur kuulsõ vällämaal pallo lämmind kässiplaksumist. Kuraasiga lautiti: «Võro liin om ilma naba, pinil om hand ja poodin om saba...» (Ilvese Aapo «Võro kiil»). Viil kanti ette Rahmani Jani «Puupää rock'n'roll», Rips-Laulu Pireti säet «Taivaheminek» (sõna: Kolga Raimond) jne. Pääle tuu kõlasi festivalil koori esitüsen Tormise Veljo ingerisoomõkeeline sari «Unustatud rahvad. Ingerimaa õhtud».

KABUNA KAIT, tsõõri koori vilistlane

